

ANIJ EJ MĀLEJJOŃ IM KAJERBAL JOSEP

Köttöpar ko an katak in:

- Kwaļok bwe Anij ej irooj ioon aolep men.
- Kwaļok bwe Anij ej kōjparok kallimur ko An.
- Kwaļok bwe Josep ear tōmak Anij.
- Kwaļok bwe Anij e maroñ ukōt nana ñan emman.

Melele ko relap ilo katak in:

- Jen kile bwe je maroñ tōmak Anij, bwe Ej kōmman men ko Ej ba.
- Jen lo bwe ewor nana ilo laļ in kōnke jej aolep ri jerowiwi.
- Jen lo bwe e aorok tōmak Anij.
- Jen lo bwe Anij ej irooj ioon men otemjej.

Unin ad katak kōn ri etto ro ilo Kallimur Mokta ej kōnke bwebwenato kein rej katakin kōj kōn karok eo an Anij ñan lomōoren armej. Ke emōj an armej jerowiwi, Anij make kōn jouj eo An ear kwaļok juon kallimur ikijjen lomōor. Ear ba bwe Enaaj jilkintok juon Ri Lomōor, ineen juon kōrā, Eo enaaj bōk anjo ioon Setan (Jen. 3:15). Kab, Ear ba bwe Armej in enaaj itok jān baamle an Ebrean, im kōn E, armej otemjej ilo laļ re maroñ jeraamman (bōk lomōor jān jerowiwi). Anij ear bar leļok kallimur in ñan Ebrean, Isaak, im Jekōb. Ej melele in bwe Ineen kōrā eo, Ri Lomōor eo, enaaj waļok jān bwijin Jekōb. Emōj ad katak kōn jikin uwe eo me Jekōb ear loe ilo an ettōnak. Kiiō jej katak kōn Josep nejin Jekōb.

1. Josep ear nejin Jekōb makmake.

Ālikin an Jekōb ettōnak im lo jikin uwe ñan lañ, ear etal im jokwe ippān uncle eo an etan Leban. Ilo iien eo Anij ear kajeraamman e im leļok ñan e juon baamle eļap.



Genesis 37:3 Kiiō Israel ear yokwe Josep eļap jān ro nejin otemjej, bwe e nejin ke e lōļlap, im ear kōmman juon an nuknuk me elōñ color ie.

Ajri eo nejin Jekōb me ear yokwe eļap jān aolep ear Josep. Bōtab Josep ear jab maanje eo nejin. Ruban ear maanje eo, im Josep ear diktata nejin Jekōb ilo iien an bwebwenato in waļok. Bwe Jekōb en kwaļok joñan an yokwe Josep, ear leļok ñan e juon kopā im elōñ coloren. Men in ear juon kakōlle ñan ro jein Josep bwe eļap an jemān yokwe e.

2. Ro jein Josep raar kōjdat e.



Genesis 37:4 Im ke lomāro jein raar lo bwe jemaer ej yokwe e eļap jān ro jein im jatin otemjej, raar kōjdat e, im ban kōnono aenōmman ñan e.

* **Armej rej ri jerowiwi. Ej aikuj Anij bwe e jab maroñ make lomōoren e.**


Etke ewor dike ilo laļ in? Etke je jab aolep make yokwe doon? Kōnke jej ri jerowiwi, im jerowiwi ko

ad rej kōjepel kōj jān Anij.



Aiseia 59:2 A ami kōmman ko re nana raar kōjepel kom jān ami Anij, im jerowiwu ko ami raar pinej turin mejān jān kom, innām E jab kōnaan roñ.

Ke je lotak, je jepel jān Anij. Baibōl ej ba bwe būruōd re “obrak kōn jerowiwu” (Ekk. 9:3). Jej ri jerowiwu ainwōt jimmad, Adam.



Jerowiwu ko ad rej kōjepel kōj jān Anij

Ro jein Josep raar dike e kōnke ear kwaḷok nana ko aer nān jemaer. Josep ear tōmak Anij, bōtab ro jein raar jab.

3. Ettōnak ko an Josep.



Jenesis 37:5-8 Im Josep ear ettōnak juon tōnak, im ke ej kōnnaanōk ḷōmaro jein, im eḷapḷok aer kōjdat e. [6] Im ear ba nān er, “Komwin roñjake, ij akweḷap nān kom, tōnak in iar ettōnake: [7] Bwe, lo, jaar pād im korak tir ilo jikin kallib, im lo, tir eo aō ej make jerkak, im ej jutak jimwe. Im lo, tir ko ami raar kōpool e, im rej badikdik jān tir eo aō.” [8] Im ḷōmaro jein raar ba nān e, “E mool kwōnaaj irooj iom ke? Ak e mool enaaj am pepe kōn kōm ke?” Im eḷapḷok wōt aer kōjdate kōn tōnak ko an im naan ko an.

* **Anij e jeḷā men otemjej.**

Anij ear jeḷā ta eo enaaj waḷok nān baamle eo an Josep.

- Josep ear jeḷā ta eo enaaj waḷok tokālik ke? Ear jab.
- Josep ear meḷeḷe wāween an naaj tōprak tōnak ko an ke? Ear jab.
- Anij e jeḷā men otemjej. Ear ba bwe Josep enaaj ri tōl eo an baamle eo.

Ta meḷeḷe in ettōnak in? Wōn ear kwaḷok ettōnak in nān Josep? Anij. Ettōnak in ear kwaḷok bwe juon raan ro jein Josep renaaj badikdik jān e. E meḷeḷein bwe Josep enaaj juon ri utiej. Anij ear kwaḷok men kein nān Josep kōnke Anij e jeḷā kobban ilju im jekḷaj. Anij e jeḷā men otemjej. Elōñ ke juon armej im e jeḷā ta eo enaaj waḷok ilju im jekḷaj? Ejjeḷok. Eñin un eo bwe jej aikuj lōke Anij im ḷoore E wōt.



Aiseia 46:10 Im Ij kwaḷok jemḷoken jān jinoim, im jān iien moxtata, men ko jañin kōmmane; im Ij ba, Aō pepe enaaj jutak, im Inaaj kōmman aolepen kōnaan ko Aō.

Jej barāinwōt lo bwe ro jein Josep raar dike e kōn an kwaḷok jet ettōnak ko im ear ettōnak kaki. Anij ear liḷok elōñ ettōnak ko re aorōk nān Josep. Ro jein ren kar roñjake Josep. Bōtab raar jab. Raar ba bwe Josep ear wōtan. Raar ba bwe ear kanōbar.


4. Josep ej iioon juon jorrān eḷap.

Joñan an ɭap an ro jein Josep kar dike e, raar iten man e. Ruben ear ba ren jab man e, innam raar joɭok e ilo juon roñ. Ke raar jijet im moñā, raar lo jet ri Midian me rej etal nan Ijpt.



Jenesis 37:28 Innām ri Midian, rū wia, rej iten kijoon ijo, im raar tōbwe im kotake Josep jān lowaan roñ eo, im wiakake Josep nan ri Ishmael kōn roñoul moñtan silver. Im raar āñinɭok Josep nan Ijpt.

Ro jein Josep raar wia kake e! Ri Ishmael rein raar jujen bōkɭok Josep nan Ijip im raar wia kake e nan juon ri mweie etan Potipar, im Josep ear juon ri kamakoko ilo mweo imōn. Eɭap an kōrā eo ippān Potipar mejkaiie kake Josep, bōtab Josep ear abwin kiki ippān. Joñan an kōrā eo illu ippān, ej kanaanai e nan Potipar. Ear riab im ba bwe Josep ear kajjioñ in kōmman ɭoñ ippān. Joñan an illu Potipar, ear kalbuuj e.



Jenesis 39:20 Im irooj eo an Josep ear bōk e, im likūt e na ilowan jikin kalbuuj eo, ijo rej liāpe ro ri kalbuuj an kiin eo; im ear pād ijo ilowan jikin kalbuuj.

Ilo ad ɭomnak kake bwebwenato in, jej lo bwe Josep ear tōmak wōt Anij.

- Ro jein raar dike & wiakake.
- Ear erom juon ri kamakoko.
- Lio ippān Potipar ear riab kōn e.
- Ear kalbuuj.

Bōtab, Josep ear tōmak Anij. E kanooj aorōk bwe jen tōmak men ko Anij ej ba. Je ɭak lale, Josep ear jorrān kōn an kōmman jimwe. Eɭaññe ear jab kwaɭok ettōnak ko an nan ro jein innām e ban kar jorrān. Eɭaññe ear kiki ippān lio pāleen Potipar innām e ban kar kalbuuj. Wōn ejab ba, bōlen je naaj jeraamman ñe jej jerowiwi ke? Jaab. Jorrān kein im raar waɭok nan Josep, raar jab kein koḱkure e. Raar kein mālejoñ e im kein kapen ɭok e ilo tōmak. Eɭap tata jorrān kein raar waɭok ilo plan im pepe an Anij nan kaiboojoj Etan im kwaɭok An kajoor ioon men otemjej.

5. Anij ear lale im kōjparok Josep.

*** Anij e tiljek, im E jab oktak.**



Jenesis 39:23 Ri lale jikin kalbuuj e jab lale jabdewōt men eo iumwin pein Josep; bwe Jeova ear pād ippān, im men eo ear kōmmane Jeova ej kejeraammane.

Ke Josep ear pād ilo roñ eo, Jeova ear pād ippān. Ke ro jein raar wia kake e nan ro Ri Ishmeel, Jeova ear pād ippān. Ke kōrā eo ippān Potipar ear kapoki, Jeova ear kakajoor e. Ke ear pād ilo kalbuuj eo, Anij ear lale e im kōjparok e. Ejab jabledetak wōt an Anij jermal. Ewor unin An kōmmani men otemjej. Ewor tokjān kajjojo men me ej waɭok ilo mour ñe am. Kiiō jenaaj lo men ko me raar waɭok ilo mour

eo an Josep.

6. Anij ear kautiej Josep.

Anij ear jab meļokļok Josep ak kallimur ko An. Kwōj lōmņak ke bwe enaaj pen an Anij kautiej Josep ilōñin ro jein ke Josep ej pād ilo kalbuuj kiiō? E jab; ejjeļok juon men e pen ñan Anij.

Ke eņōj an Josep pād ilo kalbuuj iumwin ruo jimma iiō, Pero ear ettōņak.



Jenesis 41:1-4 Innām, ālikin ruo iiō re iio, Pero ear ettōņak, im lo, ear jutak iturin river eo. [2] Im lo, jiljilimjuon kau re kilep im reņņan, rej ato jen river eo, im raar mōñā ilo juon jikin wūjooj. [3] Im lo, bar jiljilimjuon kau raar atotok ālikier jān river eo, re nana im re mō, im jutak ippān kau ko jet iturin river eo. [4] Im kau ko re nana im re mō raar kañi kau ko jiljilimjuon ko re kilep im reņņan. Innām Pero ear ruj.

Wōn ear likūt tōņak in ilo lōmņak an Pero? Anij. Je jab ba bwe aolep tōņak ko ad rej an Anij kōnnaan ñan kōj, ak E maroñ kōmņane kain in ñe E kōņaan. Anij e jeļā wōt ta eo enaaj waļok ilju im jekļaj ke? Aet.



Jabōn Kōnnaan 21:1 Būruon kiiñ ej ilo pein Jeova, ainwōt iaļ in river; ej kajeorļok e ijoko jabdewōt E kōņaan.

Ālikin tōņak in im bar juon tōņak, Pero ear pok. Ear jeļā bwe ewor meļeļein tōņak kein, ak ear jaje ta. Juon iaan ri karijeran ear keememej Josep ilo jikin kalbuuj, im ear ba ñan Pero bwe Josep e maroñ jipañ. Pero ear kūrtoķ Josep jān mōn kalbuuj eo, im Anij ear jipañ Josep bwe en kōmmeļeļeik Pero kōn tōņak ko.



Jenesis 41:25 Im Josep ear ba ñan Pero, “Tōņak eo an Pero juon wōt; Anij ear kwaļok ñan Pero men eo E nañin kōmņane.”

Ke eņōj an Josep kwaļok meļeļe kein, Pero ear koutiej Josep bwe en kein ka ruo ilo āne eo.



Jenesis 41:41-43 Im Pero ear ba ñan Josep, “Lo, iar kairooj eok ioon aolepen āneen Ijipt.” [42] Im Pero ear bōk riiñ eo jān pein, im likūt e ña ioon pein Josep, im ear kanuknuk e kōn nuknuk linen e aidik iden, im ear likūt marmar gold ña i kōnwaan. [43] Im ear ba en uwe ilo jariot eo kein ka ruo ippān; im raar lamōj iṁaan, “Badikdik!” Im ear kairooj e ioon aolepen āneen Ijipt.

Ilo e make, Josep

- ear jab maroñ make lōmōren e jān jikin kalbuuj.
- ear jab maroñ koutiej e bwe en juon irooj eļap ilo Ijipt.
- ear jab maroñ jeļā kōn tōņak ko an Pero.


7. Ro jein Josep raar itok im bādikdik iṁaan.



Jenesis 42:6 Im Josep ear irooj ion āneo; im eo ej wiakake ñan ri āneo. Im lōmaro jein Josep raar itok, im make badikdik ñan laļ iṁaan mejān.

Anij ear kōmman bwe en tōprak tōnak ko an Josep. Ro jein raar itok im badikdik jān e.

Bwebwenato in ej katakin kōj bwe Anij ej pepeik aolep men. Anij ear kōmman aolep men kein bwe en lōmooren bwijin Ebrean im kōjparok er jān jorrān. E kar waļok juon nūtta ilo āneen Kenan. Ear maat kijan Jekōb im baamle eo an. Anij ear likūt Josep ilo juon jikin eļap bwe en āinwōt juon ri Lōmoor nān baamle eo an.



Jen jab meļokļok bwe juon Ri Lōmoor enaaj waļok jān bwijin Ebrean. Jetan e kōnaan kōkkure bwij in, kōnke e jeļā bwe eļañne e waļok Ri Lōmoor in innām enaaj juur bōran. Bōtab, karōk eo an Jetan eban tōprak. Lōmoor ej an Anij.

8. Josep ej kwaļok wōn e nān ro jein, im Jekōb ej etal nān Ijpt.



Genesis 45:4,5 Im Josep ear ba nān ro jein im jatin, “Kōmwin ruwaaktok nān eō, ij akweļap nān koṃ.” Im raar ruwaakļok. Im ear ba, “Ña Josep, jatōmi, me koṃ ar wiakake nān Ijpt. Innām kiiō koṃwin jab būromōj, im jab āliklik, kōn ami kar wiakake eō nān ijin; bwe Anij ear jilkintok eō imaami bwe in kōjparok mour.”

Josep ear kwaļok e make nān ro jein. Jenaaj kar lōmṃak bwe Josep enaaj illu ippaer im pukot iien ṃan er. Bōtab, Josep ear tōmak Anij, im ear jeļā bwe ewor unin an Anij likūt men kein re pen ilo mour eo an. Josep ear juon ri jerowiwī āinwōt kōj aolep, ak ear tōmak Naan in Anij. Ear errā ippān Anij bwe e juon ri nana im ekkar bwe en mej. Ear errā ippān Anij bwe Ri Lōmoor eo wōt e maroñ in juļok bōd ko an.



Genesis 46:5-6 Im Jekob ear etal ļok jān Bier-shiba; im lōmaro nejin Israel raar ektak Jekob, jemaer, im ro nejier, im liṃaro pāleir, ilo wagon ko Pero ear jilkintok bwe ren ektakļok e. Im raar bōk kidu ko aer, im ṃweieir, ko raar jibadek i āneen Kenean, im raar itok nān āneen Ijpt, Jekob, kab ro ineen otemjej ippān.

Elōñ iiō re mootļok, Anij e kar ba nān Ebrean bwe ro ineen renaaj etal nān bar juon laļ im pād ie iuṃwin elōñ iiō. Kiiō, e jejjet men eo Anij ear ba. Aolep iien, Anij ej kōmman men ko Ej ba Enaaj kōmmani.

Anij ear leļok āt in “Israel” nān Jekōb. Ñe jej kōnono kōn ro ri Israel, jej kōnono kōn armej ro me raar itok jān Jekōb. Ilo raan kein wōt jej roñ kōn Israel ilo news. E jañin ṃōj an Anij jermal ippaer, im Enaaj kōmman bwe en tōprak aolep Naan ko An.

Kajjitōk ko

1. Wōn nejin Jekōb im ear yokwe tata?

2. Wōn eo im ear maanje eo nejin Jekōb?
3. Ewi wāween an kar Jekōb kwaḷok an yokwe Josep?
4. Etke ro jein Josep raar dike e?
5. Wōn ear liḷok ettōnak kein ñan Josep?
6. Ettōnak kein raar kwaḷok ta?
7. Ro jein Josep raar kōmman ta ñan e?
8. Ta eo ear waḷok ñan Josep kōn an tōmak wōt Anij?
9. Josep ear joḷok an tōmak Anij ke?
10. Wōn ear pepeik aolep jorrāan kein bwe ren waḷok ñan Josep? Etke?.
12. Ewi ri Lomōḡ eo juon me Anij ear kapeke bwe en lomōḡren ro ri tōmak?